

# MARSIHO PROUVÈNÇO...

La capitalo prouvençalo de la culturo éuropenco 2013 a enrega li festività pèr uno messo soulènno en lengo nostro...



# Prouvènço d'aro

Tóuti li mes, lou journau de la Prouvènço d'aro

Febrié 2013

n° 285

2,10 €

## Librejado 2013

Dimenche 3 de mars  
à Castèu-Goubert

Fuguèron nombrous l'an passa, escrivan e vesitaire, mau-grat lou marrit tèms, à participa à la proumièro Librejado. Fort d'aquelo reüssido e de l'unanimo aprobacioun, lou Felibrige se prepauso de recampa pèr la segoundo annado, ensèn, pèr uno journado, tóuti aquéli qu'escrivon vuei en lengo nostro entre Aup e Ceveno.

L'ourganisacioun sara adoubado diferentamen de la proumièro edicioun, li presentacioun dóu matin e lou councert de l'après-dina estènt pas renouvela. Demourara bèn segur lou rescontre emé lou public pèr l'oufri la plus bello veirino que siegue de l'escrit en Prouvènço e, de mai, de tèms de la journado se tendran de taulo redouno.

Es de souveta que tourna-mai, se fara bèn veïre que l'escrituro prouvençalo es pas quacarèn d'a passa tèms, que lis autour de libre soun toujours presènt à l'ouro d'aro, que parlon, escrivon sa lengo e qu'aquí signon sis oubrage.

Dins aquelo escasènço, lou Felibrige fidèu à soun respèt de tóuti li biais de veïre, de dire e d'escríeure, fidèu à-n-aquel esperit de cumprenesoun de chascun, counvido de-bon tóuti lis escrivan de Prouvènço e de Ceveno qu'escrivon en lengo nostro.

Aquéu segound rescontre de *Librejado*, se debanara, lou dimenche 3 de mars 2013, au Cèntre de culturo prouvençalo Daniel Audry, 45 balouard Barra à Castèu-Goubert (Marsiho), duberturo de 10 ouro à miejour e miejo e de 14 ouro à 17 ouro. Uno proumièro taulo redouno, sus lou tèmo "urbanita, ruralita : es-ti que nosto lengo s'encapo em' uno meno d'inspiracioun ?" se tendra entre 10 e 11 ouro. À 11 ouro e miejo : acuei dis autourita, aloucuciuon e aperitiéu.

Uno segoundo taulo redouno, sus lou tèmo "qunto creacioun literàri pèr li loucutour d'aro ?" se tendra entre 15 e 16 ouro.

La Librejado à Castèu-Goubert es un biais de s'entrauca dins Marsiho Capitalo éuropenco de la Culturo 2013 qu'ignoro quasimen tout de la culturo nostro.

Emé la Librejado, nosto lengo porto la bello provo que pèr sèmpre coungreio de creacioun literàri vo scientifico e qu'a, osco seguro, de respèndi dins Marsiho, à Castèu-Goubert lou dimenche 3 de mars, de pas manca.

Pèr mai d'entre-signè : **Librejado**  
FELIBRIGE 8 bis avenue Jules Ferry 13100  
Aix-en-Provence 04 42 27 16 48  
contact@felibrige.org

## Marsiho, la capitalo



## Nosto grando journado

### Marsiho 2013

**La Grando journado: lou dimenche 13 de janvié**

Tout lou mounde esperavon aquelo journado. Lou soulèu èro pas au rendés-vous mai pamens ensouleiaivo li cor de tóuti li participant. À l'espèro davans la catedralo de La Major, l'ourganisacioun èro bèn mountado : chasque groupe avié soun numerò e soun guide. Tre l'arribado di càrri, à la Catedralo, tout se debanè au det : l'intrado, lou passage chascun à soun tour, souna pèr soun numerò e plaça. Tre 10 ouro 30, lis autourita marsiheso arribèron tambèn , emé soun proumié conse, J.-Glaude Gaudin, acoumpagna de maire d'arroundissamen, e tambèn Jaque Moutet, capoulié dóu Felibrige acoumpagna, éu, de la rèino Angelico e de quàuqui majourau.

Presidado pèr Mounsegne G. Pontier, archevesque de Marsiho, ajuda pèr lou Paire M. Courvoisier, de la counfrarié de Eugèni Mazonod, qu'èro mes à l'ounour. La messo fuguè celebrado en prouvençau, pèr lou paire, Majourau, M. Desplanches emé un bèu prone sus la lengo, lou paire S. Montagard e lou paire A. Ottonello, curat de la Catedralo.

200 couristo èron vengu di despartamen vesin pèr canta en prouvençau : avien fa quàuqui repeticion e tout lou mounde èron lèst pèr aqueste grand jour.

Un repas ié fuguè servi i *Dock du Sud*, toujours dins l'ordre e la counvivialita.

Li groupe qu'an defila sus la Canobiero sourrisien e gramaciavon li gènt vengu pèr pica di man à soun passage.

Sara belèu la souleto representacioun dóu pople prouvençau d'aque-

### Marsiho Prouvènço 2013

La lengo nostro es pas estrangiero à la fèsto de la culturo...

Pajo 2

### Miquèu Pellegrin

Noste cantaire es tambèn musician coumplèt, afouga de jazz.

Pajo 3

### La gramatico plan-planet

Lou tome II de nosto grammeireto que se publico tóuti li mes, es sourti.

Pajo 10